

CONGREGATIO DE CAUSIS SANCTORUM

ILLERDENSIS

BEATIFICATIONIS seu DECLARATIONIS MARTYRII

SERVORUM DEI

IOANNIS A IESU
et III SOCIORUM

ORDINIS CARMELITARUM DISCALCEATORUM

atque

PAULI SEGALA SOLÉ

SACERDOTIS DIOECESANI

(† 1936)

DECRETUM SUPER MARTYRIO

«Semper mortificationem Iesu in corpore circumferentes, ut et vita Iesu in corpore nostro manifestetur. Semper enim nos, qui vivimus, in mortem tradimur propter Iesum, ut et vita Iesu manifestetur in carne nostra mortali» (2 Cor 4, 10-11).

Haec beati Pauli Apostoli verba altissimum christianorum martyrii mire enarrant mysterium, quod novissime in Servorum

Dei vita Patris Ioannis a Iesu, fratris Bartholomaei a Passione, Patris Silverii a Sancto Aloysio Gonzaga, Patris Francisci ab Assumptione et Reverendi Pauli Segalá Solé consummatur, quorum passio in odium fidei passionis Christi est communicatio, qui vitam suam etiamnum in nos pandit et confessionem credentium aetatibus praesertim magnae societatis eversionis profundique religionis contemptus, sicut haec sunt quae vivimus tempora, fovet. Qui, enim, pulchrum fidei Christo suum praestiterunt testimonium dirae persecutionis contra religionem catholicam tempore illius, quae dimidia fere quarta vicesimi saeculi decade Hispaniam acriter vastavit, et pro amore eius discrimina iniuriasque et innocentes poenam usque ad sanguinis effusionem passi sunt.

Huius martyrum catervae caput Pater Ioannes a Iesu est, presbyter ex Ordine Carmelitarum Discalceatorum, qui in civitate AUSA intra fines provinciae Barcinonensis die 19 mensis Augusti anno 1917 natus est et consecuto die ad regenerationis fontem ductus Ioannis Iosephi Thomae sumpsit nomina. Vota religiosa perpetua apud Ordinem Fratrum Carmelitarum Discalceatorum a Beata Maria Virgine a Monte Carmelo emisit ac die 14 mensis Iunii anno 1930 presbyteratu auctus est. Pro Christi et Ecclesiae amore una cum socio fratre Bartholomaeo a Passione martyrium passus est. Hic vero die 4 mensis Septembris anno 1894 in vico Caprilia intra fines provinciae Tarraconensis ortus est et in ecclesia paroeciali paucis post diebus, Iosephi imposito nomine, ad baptismalem fontem regeneratus. Anno 1920 Novitiatum Patrum Carmelitarum Theresianorum ingressus est, apud quos nomen Bartholomaei ei impositum est et die 21 mensis Septembris anno 1921 vota religiosa emisit. Die 24 mensis Iulii anno 1936, ab armigeris seditiosis quibusdam obiter simul inventi, dum, conscii

se in magno discrimine esse vitae, de torculario prope Sanctuarium Sanctae Teresiae a Iesu Infante Illerdense, quo paucis iam ante diebus confugerant, discedere moliebantur, et statim plumbis transfossi sunt. Moderator ephemeridis, cui vulgo titulum *Lluvia de Rosas* et apud quam operam dabant, his verbis enotavit facinora: «Sanctuarium Deo atque Hispaniae sanguinem duorum martyrum obtulit. Opperiamur, igitur, dum de caelo benignum eorum subsidium accipiamus».

Pater Silverius a Sancto Aloysio Gonzaga, presbyter ex Ordine Carmelitarum Discalceatorum, in vico vulgo dicto *Corroncuy* intra fines provinciae Illerdensis die 12 mensis Martii anno 1864 natus est et eodem die ad regenerationis fontem ductus Gregorii Iacobi nomina sumpsit. Vota religiosa perpetua die 30 mensis Augusti anno 1883 emisit et Valentiae die 31 mensis Martii anno 1888 presbyteratu auctus est. Religiosus omnibus pernotus et valde propter pietatem suam et operam indefessam ad devotionem erga Beatam Virginem Mariam a Monte Carmelo diffundendam probatus, aequus indole et hilaris, rerum socialium praesenserat tractum ac sibi se modo cum «Pater Silverius» esset interfectorum persuadebatur. Mense Iulii anno 1936, e Conventu Tarraconensi Illerdam fugit, sed cum die 27 mensis Iulii anno 1936 in civitatem adventus est, apprehensus est et una cum aliis presbyteris ac religiosis in carcerem coniectus. Die 20 mensis Augusti 1936, ad coemeterium civitatis cum coetu aliorum undecim ductus est et plumbis transfossus una cum aliis acclamans: «Vivat Christus Rex!», sibi sanguinem suum multorumque aliorum – uti dictitabat – conscius expediturum esse, ut immensae licentiae turpitudinis ac neglectae Missae participationis dilueret sordes.

Pater Franciscus ab Assumptione, presbyter ex Ordine Carmelitarum Discalceatorum, in vico vulgo *Montgay* intra fines provinciae Illerdensis die 15 mensis Maii anno 1912 natus est et triduo post ad regenerationis fontem ductus Francisci sumpsit nomen. Vota religiosa perpetua apud Ordinem Carmelitarum die 8 mensis Septembris anno 1929 emisit et Barcinone die 12 mensis Aprilis anno 1936 presbyteratu auctus est. Eodem anno, paucis post mensibus, una cum fratre suo interemptus est Reverendissimum Paulus Segalá Solé, qui, in eodem vico die 18 mensis Octobris anno 1903 ortus et quadriduo post baptizatus, studiis apud Collegium Fratrum Minorum de *Balaguer* inceptis et intra moenia Seminarii dioecisani Illerdensis expletis, die 2 mensis Iunii anno 1928 presbyteratu auctus est. Ambo fratres sponte sua armigeris seditiosis sese tradiderunt, ne propinqui eorum ob iam comminatum mortem quidquid periclitarentur. Mane diei 8 mensis Augusti e domo ablati, in carcerem Illerdensem adducti sunt, ubi multos captivos consolabantur ac suscitabant deperditos. Matrem dein suam, quam salutabant, allocuti sunt: «Vale, mater, et ad nos in coelo revisamus, quo iamiam commigraturi sumus» et cum aliis septuaginta mane diei 20 mensis Augusti plumbis transfossi sunt.

Super horum Servorum Dei caedem, quorum fama martyrii clam in communitatem ecclesiam admodum incessit et persuasio admodum crevit, ut sancti essent qui vitam suam pro Deo fortiter obtulerunt, apud Curiam Episcopalem Illerdensem anno 1952 Processus Informativus celebratus est, cuius auctoritas et vis iuridica a Congregatione de Causis Sanctorum Decreto diei 31 mensis Ianuarii anno 1992 probatae sunt. *Positione* confecta, iuxta suetum morem disceptatum est an Servorum Dei mors martyrium fuisset. Die 4 mensis Decembris anno 2010 Congressus Peculiaris

Consultorum Theologorum prospero cum exitu factus est. Patres Cardinales et Episcopi in Sessione Ordinaria die 7 mensis Maii anno 2013 habita, cui egomet ipse Angelus Cardinalis Amato praefui, agnoverunt mortem supradictorum Servorum Dei ob fidelitatem erga Christum et Ecclesiam confessam in odium fidei martyrium fuisse.


De hisce omnibus rebus, referente subscripto Cardinale Praefecto, certior factus, Summus Pontifex Franciscus, vota Congregationis de Causis Sanctorum excipiens rataque habens, hodierno die declaravit *Constare de martyrio eiusque causa Servorum Dei Ioannis a Iesu et III Sociorum, Ordinis Carmelitarum Discalceatorum, atque Pauli Segalá Solé, Sacerdotis Dioecisani, in casu et ad effectum de quo agitur.*

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 3 mensis Iunii a.D. 2013.



ANGELUS Card. AMATO, S.D.B.
Praefectus



✠ MARCELLUS BARTOLUCCI
Archiep. tit. Mevaniensis
a Secretis